

e rite ana hei whangai ma te tangata i ana tamariki, kaore ano nei i eke nga tau ki nga tau e rite ana hei haerenga mo ratau ki te mahi hereni hei oranga mo ratau.

Tera ake etahi huarahi moni a te Kawanatanga, ko nga moni reti o nga whenua o te Karauna, e riihitia ana: ko nga moni e utua ana ki nga Kooti; ko nga whaina mo te takahi i te ture; ko nga moni ruuri; ko nga pukapuka e hokohokona ana. Otira he moni ririki e hua ana mai i ena huarahi. Ara nga huarahi nunui kua whakamaramatia i runga ake ra.

Na, kei hea he huarahi whakahe ma tatau ma te Iwi Maori i enei tikanga a te Kawanatanga, e puta nei ki a tatau tahi ko o tatau hoa pakeha nga painga? Kaore e taea te whakahe. Kotahi ano te wahi i ata hanga ai te whakaeke mai o enei taimahatanga ki runga ki te Maori, kei te ngoikore o te Maori, kei te hereherea e ona whenua e nga tikanga maha, i takea mai i runga i nga tikanga Maori, i te roa e whakawhitia ana o nga taitara whenua ki raro i te ture pakeha.

Kaati i konei nga whakamarama mo nga whakahaerenga o nga moni o te Tominiona. E kore e taea te whakarapopoto ki roto ki tenei panui nga whakamarama katoa, he maha rawa no nga kaupeka o tenei take

TE POARI WHAKAHAERE I NGA KORERO TAWHITO.

KUA tae mai te ripoata a te Poari mo nga whakahaere o ta ratou hui tuatahi i tu ki te Whare-paremata i Poneke i te 30 o nga ra o Oketopa.

Ko nga motini enei i paahitia:—

- (1) Kia whakaritea ko H. R. H. Balneavis (Te Raumoa) he Hekeretari no te Poari.
- (2) Kia whakamana e te Minita mo te taha Maori te hiiri o te Poari.
- (3) Kia utua te £50 i te tau ki *Te Toa Takitini* mo te perehi i uga take a te Poari i roto i taua pepa i ia marama.
- (4) Kia £100 hei awhinatia ma te Poari i te Polynesian Society i tenei tau, a kia £300 a tera tau, kia oti ai te te perehi o ta ratou pukapuka.
- (5) Kia waiho ma te Poari e perehi te pukapuka i tuhia e Te Peehi, tona taitara ko "Te Maori."
- (6) Kia puta he mihi ma te Poari ki a Ngati Porou mo ta ratou moni e £250 hei awhina i nga mahi a te Poari, ara hei whakarite i tetahi wahi o nga raruraru mo te perehi i "Te Maori" i tuhituhia nei e Te Peehi.
- (7) Kia whakaritea he Komiti hei whiriwhiri mo nga raruraru katoa o te tuku i tetahi ropu ki Tahiti, ki Raiatea me era atu moutere o te Moana-nui-a-Kiwa, rapu haere ai i nga korero tawhito.
- (8) Kia puta he mihi ma tenei Poari ki a Roa Manunui, me tona whanau katoa mo te Aitua i pa nei ki a ratou i te matenga atu o Te Whatahoro, te Kai-tuhituhi o nga korero tawhito.